

HASiL/2026/05/21 – 31

**HASiL PERGIAT PENGUATKUASAAN MELALUI
TASK FORCE OPERASI GUAMAN SIRI 1 TAHUN 2026**

JOHOR BAHRU, 21 MEI 2026 – Lembaga Hasil Dalam Negeri Malaysia (HASiL) terus memperkukuh agenda pematuhan cukai menerusi pelaksanaan **Task Force Operasi Guaman (TOG) Siri 1 Tahun 2026** yang berlangsung mulai 21 Mei hingga 24 Mei 2026 sebagai langkah strategik meningkatkan keberkesanan penguatkuasaan terhadap pembayar cukai yang culas melunaskan tunggakan cukai dan kompaun.

Pelaksanaan operasi berskala nasional ini memberi fokus terhadap **2,213 syarikat dan individu di seluruh negara** yang masih gagal menjelaskan tunggakan cukai meskipun notis peringatan telah dikeluarkan sebelum ini, melibatkan tunggakan cukai dan kompaun bernilai tinggi.

Operasi ini dilaksanakan sejajar dengan komitmen HASiL dalam memastikan kutipan hasil negara kekal konsisten dan mampan, di samping memperkukuh integriti sistem percukaian negara demi menyokong pembangunan ekonomi serta kesejahteraan rakyat.

Antara objektif utama pelaksanaan TOG Siri 1 Tahun 2026 ini ialah mempertingkatkan kutipan tunggakan cukai dan kompaun secara lebih efektif, memperkukuh pematuhan

sukarela dalam kalangan pembayar cukai dan meningkatkan keberkesanan tindakan penguatkuasaan melalui jalinan kerjasama bersama agensi penguatkuasaan.

Tindakan undang-undang yang lebih tegas termasuk prosiding sivil dan pendakwaan di mahkamah akan diambil terhadap pihak yang gagal mematuhi peruntukan undang-undang percukaian yang berkuat kuasa. Operasi ini juga merupakan peringatan berterusan kepada pembayar cukai agar melaksanakan tanggungjawab percukaian tepat pada masanya bagi mengelakkan tindakan penguatkuasaan diambil.

HASiL Johor telah dipilih sebagai tuan rumah bagi Majlis Perasmian dan sesi *flag-off* TOG Siri 1 Tahun 2026 dengan kerjasama strategik Polis Diraja Malaysia (PDRM). Majlis tersebut telah disempurnakan oleh YBhg. Datuk Hisham Rusli, Timbalan Ketua Pegawai Eksekutif (Dasar) HASiL di Menara HASiL Johor.

Turut hadir ialah Puan Shifaak Md. Amin, Pengarah Negeri HASiL Johor; Puan Zaleha Adam, Pengarah Jabatan Undang-Undang; Puan Liz Ellyna Mohd Zaid, Pengarah Bahagian Sivil dan Pendakwaan; barisan pengurusan kanan HASiL Johor serta YDH Senior Asisten Komisioner Polis (SAC) Noor Imran Abdul Rahman, Ketua Cawangan Khas, Ibu Pejabat Polis Kontinjen Johor bersama dengan anggota PDRM Cawangan Khas.

Dalam ucapan perasmiannya, YBhg. Datuk Hisham Rusli berkata pelaksanaan TOG Siri 1 Tahun 2026 merupakan antara strategi penguatkuasaan utama HASiL bagi memastikan tahap pematuhan cukai terus diperkukuh selaras dengan sasaran kutipan hasil negara yang telah ditetapkan. Menurut beliau lagi, langkah proaktif tersebut

menzahirkan komitmen HASiL dalam memperkukuh integriti sistem percukaian negara serta memastikan setiap pembayar cukai melaksanakan tanggungjawab mereka secara adil dan berhemah demi kepentingan pembangunan negara.

Diharapkan pelaksanaan operasi ini akan terus memperkukuh sinergi kukuh antara agensi, seterusnya memastikan agenda percukaian nasional dapat dilaksanakan secara lebih berkesan, efisien dan berimpak tinggi. Usaha ini sekali gus menyokong pembentukan ekosistem percukaian yang progresif dan berintegriti ke arah memperkukuh kedudukan kewangan negara serta kesejahteraan rakyat.

Sebarang pertanyaan serta maklum balas, sila hubungi kami menerusi:

- a) Hasil Contact Centre (HCC) di talian 03-8911 1000 / 603-8911 1000 (Luar Negara);
- b) HASiL Live Chat; dan
- c) Borang Maklum Balas di portal rasmi HASiL di pautan pantas <https://maklumbalaspelanggan.hasil.gov.my/Public/>

SEKIAN, TERIMA KASIH.

MEMACU EKOSISTEM
CUKAI PINTAR

Dikeluarkan oleh:

Jabatan Khidmat Korporat

Lembaga Hasil Dalam Negeri Malaysia

Hasil Contact Centre: 03-8911 1000 / 603-8911 1000 (luar negara)

Portal Rasmi : www.hasil.gov.my

Tarikh: 21 Mei 2026

LAMPIRAN



YBhg. Datuk Hisham Rusli, Timbalan Ketua Pegawai Eksekutif (Dasar) HASiL menyampaikan ucapan sempena Majlis Perasmian *Task Force* Operasi Guaman (TOG) Siri 1 Tahun 2026.



Penyempurnaan sesi pelepasan para petugas (flag-off) di perkarangan Menara HASiL Johor.



Timbalan Ketua Pegawai Eksekutif (Dasar) HASiL bergambar kenang-kenangan bersama-sama dengan para petugas TOG Siri 1 Tahun 2026.